

Ráiteas faoi Bheartais agus faoi Phrionsabail Chuntasaíochta

Bunús na gcuntas

Ullmhaítear cuntais leithreasa, ina léirítear idirbhearta airgeadais na ranna Rialtais¹, de réir an Exchequer and Audit Departments Act 1866 (arna leasú ag Acht an Ard-Reachtaire Cuntas agus Ciste (Leasú), 1993) agus de réir na rialacha agus na nósanna imeachta cuntasaíochta atá leagtha síos ag an Aire Caiteachais Phoiblí agus Athchóirithe.

Is éard atá sna cuntais ná taifid bunaithe ar airgead tirim d'fháltais agus d'íocaíochtaí i rith na bliana i gcomparáid leis na méideanna a soláthraíodh faoin Acht Leithreasa. Léiríonn na cuntais freisin figiúirí na bliana roimhe chun críocha comparáide. Tá roinnt eolais a bhaineann le fabhrúcháin san áireamh sna nótaí a ghabhann leis na cuntais.

Cuireadh na beartais agus na prionsabail chaighdeánacha chuntasaíochta atá leagtha amach thíos i bhfeidhm in ullmhú na gcuntas. Mínítear aon imeacht ó na beartais agus ó na prionsabail chaighdeánacha i réamhrá an Oifigigh Cuntasaíochta leis an gcuntas leithreasa.

Tréimhse tuairiscithe

Is í an bhliain dár críoch an 31 Nollaig 2014 an tréimhse tuairiscithe.

Fáltais

De ghnáth is le Lárchiste an Státchiste a íoctar gach ioncam a fhaigheann an Stát.

Tá dhá chatagóir ann maidir le fáltais Roinne: is féidir iad a leithreasú i gcabhair ar chaiteachas bunaithe ar Vóta, nó ní mór iad a thabhairt suas go díreach don Lárchiste mar fháltais bhreise an Státchiste. Ba cheart cead na Roinne Caiteachais Phoiblí agus Athchóirithe a fháil i gcónaí roimh chinneadh a dhéanamh ar cheart déileáil le fáltais de chineál áirithe mar leithreasú i gcabhair nó mar fháltais bhreise an Státchiste.

Fáltais iad leithreasaí i gcabhair ar féidir iad a úsáid faoi alt 2 den Public Accounts and Charges Act 1891, chun íoc as caiteachas a mhéid atá údaraithe ag an Acht Leithreasa bliantúil. De ghnáth is fáltais iad sin a thagann i ngnáthchúrsa gnó na roinne faoin Vóta.

Éilíonn an Roinn Caiteachais Phoiblí agus Athchóirithe i gcás fáltas áirithe a fhaigheann ranna go gcuirfear iad go díreach chun sochair an Státchiste mar fháltais bhreise. De ghnáth is fáltais iad sin nach bhfuil aon bhaint dhíreach acu le caiteachas an Vóta nó is fáltais 'amhantair' iad. Ní féidir fáltais bhreise den sórt sin a úsáid le freastal ar chaiteachas ón Vóta. Nuair a bhíonn fáltais bhreise ann déantar iad a thuairisciú i nóta leis an gcuntas leithreasa (Nóta 4).

Ceanglaítear ar Ranna miondealú a sholáthar faoi fháltais bhreise an Státchiste agus míniú a sholáthar más méideanna ábhartha iad. Chomh maith leis sin, ceanglaítear ar ranna na méideanna a taisceadh don Státchiste a nochtadh (trí Chuntas Taisce Airgead Éagsúil) agus na méideanna iníoctha (ach atá gan aistriú go fóill chuig an Státchiste), i gcás nach bhfuil na suimeanna mar an gcéanna.

Ó 2014 ar aghaidh, tá iachall ar Ranna miondealú fháltais bhreise an Státchiste a chur i láthair ar bhonn iarmhéid tosaigh/iarmhéid deiridh.

¹ Sa ráiteas seo, cuimsíonn an téarma 'roinn' ranna lárnacha Rialtais agus oifigí agus gníomhaireachtaí atá freagrach as bainistiú agus as cuntasaíocht Vóta.

Íocaíochtaí

Suimeanna a tháinig chun bheith infíochta i rith na bliana iad íocaíochtaí. Meastar suimeanna a bheith tagtha chun bheith infíochta nuair atá 1) an dliteanas tabhaithe, 2) an íocaíocht dlite agus 3) treoir tugtha an íocaíocht a dhéanamh.

Sa chás go bhfuil dliteanas tabhaithe agus íocaíocht dlite (is é sin le rá go bhfuil an dliteanas aibithe), ba cheart íocaíocht a bheith críochnaithe roimh dheireadh na bliana chun sláine an chuntais leithreasa a chinntiú. I gcásanna nach ndearnadh íocaíocht agus go bhfuil dliteanais aibí fós neamhíochta ag deireadh na bliana, ba cheart méid na ndlitéanas sin a thabhairt i nóta leis an gcuntas (Nóta 2).

Nuair a bhíonn Roinn ag gníomhú mar ghníomhaire do Roinn eile (an príomhaí), rud a fhágann go mbíonn idirbhearta airgeadais i gceist idir an príomhaí agus an gníomhaire, is í an riail ghinearálta a bhfuil feidhm léi ná go gcuirfeadh an gníomhaire na hidirbhearta trí chuntas fionraí agus sonrasc a chur chuig an bpríomhaí don mhéid atá dlite. Táille deiridh i gcuntas leithghabhála an phríomhaí a bheidh san íocaíocht don tseirbhís.

I suíomhanna mar a dteastaíonn ón ngníomhaire go soláthródh an príomhaí réamh-mhaoiniú leis an íocaíocht a chumasú, níor chóir ach na méideanna sin atá deimhnithe ag an ngníomhaire mar shuimeanna a íodadh amach aige i mbliain an chuntais a ghearradh go cuntas leithghabhála an phríomhaí.

Fabhruithe

Ionchorpraíonn gach cuntas leithreasa faisnéis a bhaineann le fabhruithe sna nótaí leis an gcuntas, lena n-áirítear

- ráiteas faoi chostas oibriúcháin (Nóta 1), a léiríonn méid iomlán na n-acmhainní a chaith an roinn sa bhliain
- clár comhardaithe a léiríonn sócmhainní agus dliteanais na roinne ag deireadh na bliana (Nóta 2), agus
- nótaí míniúcháin lena n-áirítear sonraí maidir le sócmhainní caipitil, sócmhainní caipitil faoi fhorbairt, an glandlitéanas i leith an Stáitchiste, agus ceangaltais.

Áirítear ar an gclár comhardaithe an staid ag deireadh na bliana maidir leis an méid seo a leanas

- **Costais fhabhraithe** - léiríonn siad sin na dliteanais go léir ar dháta an chlár chomhardaithe, cé is moite de dhliteanais maidir le luach saothair agus pinsin. I gcás earraí agus seirbhísí, aithnítear dliteanas fhabhraithe nuair a chomhlíonann an t-íocaí an riachtanas conarthach chun na hearraí nó na seirbhísí a ordáíodh a sholáthar. Déileáiltear mar dhliteanais le méideanna atá dlite ar earraí a seachadadh, ach nár íodadh astu fós, fiú amháin mura bhfuil iniúchadh déanta orthu nó mura dtugtar go stoc iad. I gcás deontas, aithnítear dliteanas nuair a shásaíonn an deontáí ceanglais uile na scéime ach nach bhfuil aon íocaíocht faighte fós. Aithnítear dliteanais taistil agus cothabhála nuair a bhíonn an taisteal déanta.
- **Réamhíocaíochtaí** - is íocaíochtaí iad sin a rinneadh i rith bhliain an chuntais chun íoc as costais a thiocfaidh go hiomlán nó go páirteach sa bhliain airgeadais ina dhiaidh sin.
- **Ioncam Fabhraithe** - is ioncam é sin atá dlite don roinn ag deireadh na bliana cuntais ach nach bhfuil faighte fós.
- **Ioncam iarchurtha** - is ioncam é sin a fuair an roinn i rith na bliana cuntais ar earraí nó ar sheirbhísí atá le soláthar fós aici.

Sócmhainní caipitiúla

Léirítear luachanna oscailte agus dúnta na sócmhainní caipitil ar chlár sócmhainní roinne mar aon le sonraí faoi dhímheas i nóta a ghabhann leis an gclár comhardaithe.

Ní bhíonn na nithe seo a leanas san áireamh sa ráiteas maidir le sócmhainní caipitil

- sócmhainní ar fiú níos lú ná €318 iad a fuarthas ón 1 lá d'Eanáir 1995 go dtí an 31 lá de Nollaig 2003, nó sócmhainní ar fiú níos lú ná €1,000 iad a fuarthas ón 1 lá d'Eanáir 2004.
- sócmhainní oidhreachta, nach féidir a luach a léiriú go leordhóthanach i dtéarmaí airgid.

Luacháil sócmhainní

Talamh agus foirgnimh

Cuirtear gach píosa talún agus gach foirgneamh atá faoi úinéireacht an Stáit agus a rialaítear nó a bhainistítear ag roinn san áireamh sa chlár ábhartha comhardaithe (agus sa nóta ábhartha sócmhainní caipitil). Déantar bonn luachála na talún agus na bhfoirgneamh a mhíniú i réamhrá an Oifigigh Chuntasaíochta leis an gcuntas leithreasa, más ábhartha.

Nuair atá talamh agus foirgnimh 1) dílsithe d'Oifig na nOibreacha Poiblí nó 2) dílsithe d'Aire ach iad á rialú nó á mbainistiú ag Oifig na nOibreacha Poiblí, déantar iad a áireamh i gcuntas na hOifige sin. Seachas sin, taispeántar iad i gcuntas na roinne ábhartha.

Nuair a bhíonn tailte nó foirgnimh dílsithe d'Aire ach iad, i ndáiríre, faoi smacht nó faoi bhainistíocht comhlachta lasmuigh, ní áirítear iad mar shócmhainní na roinne, ach déantar úinéireacht na sócmhainne a léiriú i gcuntas na roinne.

I gcás na ranna sin nach féidir leo luachanna a sholáthar do thailte agus d'fhoirgnimh atá á rialú nó á mbainistiú acu déanann siad sceideal na sócmhainní sin a cheangal leis an gcuntas leithreasa.

Trealamh, troscán agus feistis

Déantar gach trealamh, troscán agus feisteas a luacháil ag costas.

Sócmhainní eile

Nuair a éilítear é, déantar beartais chuntasaíochta maidir le luacháil sócmhainní eile (m.sh. feithiclí sainfheidhmeacha) a leagadh amach i réamhrá an Oifigigh Chuntasaíochta leis an gcuntas leithreasa.

Dímheas

Ní dhéantar talamh a dhímheas. Nuair is cuí, déantar foirgnimh a dhímheas faoi mar a léirítear i réamhrá an Oifigigh Chuntasaíochta leis an gcuntas leithreasa.

Déantar trealamh, troscán agus feistis a dhímheas ar bhonn líne díri ar na rátaí bliantúla seo a leanas thar a saoil úsáideacha measta:

- troscán agus feistis, agus trealamh teileachumarsáide - 10%
- Trealamh agus bogearraí, trealamh eolaíochta agus saotharlainne agus innealra eile oifige - 20%
- córais mhóra bhogearraí oibriúcháin - 10%.

Nuair a éilítear é, déantar míreanna caipitil eile a dhímheas mar a léirítear i réamhrá an Oifigigh Chuntasaíochta leis an gcuntas leithreasa.

Sócmhainní caipitiúla atá á bhforbairt

Cuirtear ráiteas faoi shócmhainní caipitil atá á bhforbairt mar nóta leis an gclár comhardaithe. Léirítear ann íocaíochtaí airgid ar shócmhainní atá á bhforbairt laistigh den roinn m.sh. forbairt bogearraí nó tionscadail tógála, nach raibh aitheanta fós mar shócmhainní ag tús na bliana cuntasáíochta.

Stoic

Luaitear ábhair inchaite ag costas nó ag luachálacha rannacha cibé acu is ísle.

Glandliteanas don státchiste

Léiríonn an nóta faoi ghlandliteanas don Státchiste sheasamh maoinithe an Vóta ag dáta an chláir chomhardaithe ag cur san áireamh an fharasbairr atá le tabhairt suas agus na heisiúintí ón Státchiste ar bhonn carnach nó atrátha. Taispeántar i miondealú an fhigiúir sin iarmhéideanna bainc nó airgid tirim, fáltais féichiúnaithe atá dlite mar aon le dliteanais reatha.

Ceangaltais

Is éard is ceangaltas ann ná oibleagáid chonarthach chun íoc as earraí nó seirbhísí nuair a chuirfear ar fáil iad cé nach bhfuil siad curtha ar fáil fós ag deireadh na bliana. I gcás scéimeanna deontais, aithnítear ceangaltas nuair a fhaomhtar an deontas cé go bhfuil ar an deontaí riachtanais na scéime a chomhlíonadh fós.

Cuirtear figiúirí ar fáil i nóta faoi ghealltanais chonarthacha ar dócha go mbeidh siad ann sna blianta ina dhiaidh sin faoi fhotheidil 1) sholáthair agus 2) deontais, ach gan ceangaltais faoi bhun €10,000 a chur san áireamh.

Cuirtear nóta ar leithligh ar fáil ina dtugtar sonraí faoi aon cheangaltais chaipitil ilbhliantúla níos mó ná €6,350,000.

Nuair atá athrú le sonrú sa cheangaltas iomlán de níos mó ná €500,000 (agus ag cur san áireamh na híocaíochtaí déanta) i gcomparáid leis an suíomh deiridh bhliana roimhe seo, mínítear an fáth atá leis an ngluaiseacht.

Comhpháirtíochtaí Príobháideacha Poiblí (CPP)

Is iomaí leagan amach a bhíonn ar chomhpháirtíochtaí príobháideacha poiblí lena n-áirítear socrú maidir le dearadh, tógáil agus oibriú (DBO); dearadh, tógáil, oibriú agus maoiniú (DBOF); lamháltas maidir le dearadh, tógáil agus maoiniú (DBF), agus oibriú amháin.

De ghnáth, faoi na socruithe conarthacha do thionscadail CPP, tugann an Stát luach saothair do chomhpháirtí na hearnála príobháidí - faoi réir feidhmíochta sásúla - as cuid de na costais nó as iomlán na gcostas a tabhaíodh i ndearadh, tógáil, oibriú, cothabháil agus/nó maoiniú na sócmhainne, de réir mar is cuí. Is mar íocaíochtaí rialta aonadacha a thugtar an luach saothair go ginearálta do chomhpháirtí na hearnála príobháidí thar théarma an chonartha agus íoctar iad de ghnáth as fotheideal CPP sainithe i Vótaí na roinne. I gcásanna áirithe, féadfaidh an Stát deontas caipitil a íoc chomh maith le comhpháirtí na hearnála príobháidí thar thréimhse na tógála; dhéanfaí a leithéid d'íocaíocht as an bhfotheideal caipitil ábhartha i Vótaí na roinne. I dtionscadal lamháltais, tugtar luach saothair don earnáil phríobháideach, go hiomlán nó go páirteach, trí tháillí mar dholáí a íocann úsáideoirí.

Dlitanais theagmhasacha

Eascaíonn dliteanas teagmhasach uair ar bith a gcruthaíonn imeachtaí san am atá thart nó faoi láthair an baol go ndéanfar éileamh ar chistí an Státchiste sa todhchaí. Ní aithnítear dliteanais theagmhasacha sa chuntas ach nochtar iad i bhfoirm nóta ach amháin más beag an seans atá ann go dtarlóidh eis-sreabhadh acmhainní.

Aoisliúntas

Déantar freastal ar íocaíochtaí aoisliúntais do státseirbhísigh ar scor, do Ghardaí, do mhúinteoirí, do phearsanra de chuid Óglaigh na hÉireann, agus do phearsanra de chuid Fheidhmeannacht na Seirbhíse Sláinte (agus do phearsanra na nIarbhord Sláinte) ar bhonn íoctar mar a úsáidtear ó Vótaí 12, 20, 26, 35 agus 39, faoi seach. Níl soláthar díreach don aoisliúntas le feiceáil i gcuntais leithghabhála Vótaí eile.

Idirbhearta in airgeadra eachtrach

Aistrítear na hidirbhearta a eascraíonn as airgeadraí coigríche go Euro ag na rátaí malairte atá i bhfeidhm ag dátaí na n-idirbheart. Aistrítear sócmhainní agus dlíteanais airgid a bhíonn ainmnithe in airgeadraí coigríche go Euro ag na rátaí malairte ag deireadh na bliana.

Nótaí eile leis na cuntais

Prionsabail ghinearálta

De ghnáth is é atá mar aidhm ag na nótaí eile leis na cuntais leithreasa ná aird Dháil Éireann agus an Choiste um Chuntais Phoiblí a tharraingt ar ábhair a bhaineann le rialú parlaiminte, nó faisnéis níos iomláine a sholáthar faoi idirbhearta neamhghnácha ábhartha a thaifeadadh sa chuntas m.sh. caillteanais, íocaíochtaí speisialta nó íocaíochtaí *ex gratia*, agus luach saothair breise. Ach amháin sna cásanna atá leagtha amach thíos, ní chuirtear nótaí ar fáil ach amháin nuair a bhíonn €50,000 nó níos mó i gceist in idirbheart aonair, nó sna hidirbhearta go léir de chatagóir áirithe.

Nuair a bhíonn méideanna níos ísle ná na luachanna tairsí i gceist, cuirtear nótaí ar fáil freisin nuair a bhíonn saincheist thromchúiseach prionsabail ann nó i gcás go measann an tArd-Reachtair Cuntas agus Ciste nó an Roinn Caiteachais Phoiblí agus Athchóirithe gur cheart nóta a sholáthar.

Costais dlí:

Sna cásanna sin mar a sáraíonn na costais dhlíthiúla charnacha a thabhaítear i mbliain an chuntais €50,000, nó mar a sáraíonn na costais i gcás dlíthiúil aonair €50,000, tá nóta le soláthar le miondealú de na costais iomlána go

- táillí dlí, agus
- cúiteamh a íocadh.

Athruithe ó dheontas

Taispeánann Nóta 3 na gnáthmhíniúcháin le haghaidh athrúchán i dtaca le táirgeacht le hais soláthair.

I gcásanna ina mbíonn difríocht idir íocaíochtaí a dhéantar ó fhotheideal agus an deontas bunaidh, cuirtear nóta ar fáil nuair is

- €100,000 nó níos mó an difríocht agus
- nuair is ionann é sin agus 5% nó níos mó den fhotheideal (25% i gcás na bhfotheideal riaracháin), nó
- b'fhiú an t-athrúchán seo a mhíniú, cé nach gcomhlíonann sé na critéir thuasluaite.

In imthosca speisialta féadfar athrú de chéatadán níos ísle a mhíniú trí nóta.

Cuirtear nótaí ar fáil ar an mbonn céanna maidir le hathruithe sna catagóirí éagsúla maidir le leithreasáí i gcabhair.

Luach saothair breise

I gcás luach saothair breise, áirítear leis na sonraí a thugtar (Nóta 5) an méid iomlán a íocadh faoi gach catagóir, líon iomlán na bhfaighteoirí, líon na ndaoine aonair a fuair €10,000 nó níos mó, agus an íocaíocht aonair is airde má tá sí níos mó ná €10,000. Ba cheart méideanna téarfa nó iomarcaíochta a nochtadh freisin nuair is ábhartha.

Íocaíochtaí déanacha

I gcás íocaíochtaí úis faoi na Rialacháin um Íocaíocht Dhéanach in Idirbhearta Tráchtála 2012, cuirtear faisnéis ar fáil (Nóta 6) i gcás ina

- raibh iomlán na n-íocaíochtaí úis dlite €10,000 nó níos mó
- nó ina raibh íocaíocht aonair €10,000 nó níos mó.

Calaois nó calaois amhrasta

I gcás caillteanas de bharr calaoise, calaois amhrasta nó neamhrialtachtaí amhras, cuirtear faisnéis ar fáil (i Nóta 6) i gcás ina

- raibh iomlán na gcaillteanas i rith na tréimhse cuntasáíochta €10,000 nó níos mó, nó
- ina raibh caillteanas aonair €10,000 nó níos mó, nó
- i gcás caillteanas faoi €10,000 a raibh saincheist thromchúiseach maidir le prionsabal ag baint leo nó i gcás ina measann an tArd-Reachtaire Cuntas agus Ciste nó an Roinn Caiteachais Phoiblí agus Athchóirithe gur cheart nochtadh a dhéanamh.

Coimisiúin agus fiosrúcháin speisialta

Nuair is iomchuí bíonn ráiteas caiteachais maidir le gach coimisiún nó fiosrúcháin speisialta atá á mhaoiniú ón Vóta san áireamh i Nóta 6. I gcás inar bunaíodh coiste, coimisiún nó fiosrúchán ar bhonn sealadach, tugtar an caiteachas iomlán freisin ó bunaíodh é.

Tá an nóta scartha mar seo:

- *ad hoc*, coimisiúin téarma sheasta nó chuspóra sheasta, srl, agus
- coimisiúin bhuana nó ar ann dóibh gan aon srian ama ar leith.

Mionairgead

Bíonn suimeanna a bhaineann le mionairgead san áireamh i nochtadh comhardaithe an Phámháistir Ghinearálta.

Banc agus airgead tirim

Áirítear sa chatagóir 'Banc agus airgead tirim' iarmhéideanna cuntais de chuid an Phámháistir Ghinearálta agus gach iarmhéid chuntais bhainc thráchtála (cuntais phárolla agus cuntais eile a bhaineann leis an vóta) ar ann dóibh ag deireadh na bliana is a mhaoinítear tríd an Státchiste trí chaiteachas vótáilte nó a bhfuil le fáil iontu fáltais atá le cur i dtaisce sa Státchiste arís mar leithghabhálacha i gcabhair.

Deontas i gcabhair agus cuntais illghnéitheacha

Nuair is cuí, tugtar cuntais faoi chistí deontais i gcabhair a maoiníodh ón Vóta agus faoi chuntais ilghnéitheacha eile i Nóta 7.